

SA's Leading Past Year

Exam Paper Portal



You have Downloaded, yet Another Great
Resource to assist you with your Studies 😊

Thank You for Supporting SA Exam Papers

Your Leading Past Year Exam Paper Resource Portal

Visit us @ www.saexampapers.co.za



**SA EXAM
PAPERS**



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWASEKHAYA (HL)

LIPHEPHA LESIBILI (P2)

INDLOVULENKHULU/MASHI 2011

EMAMAKI: 80

SIKHATSI: 2½ ema-awa

Leliphepha linemakhasi la-19.

TICONDZISO KULABAHLOLWAKO

1. Fundza lelikhasi ngembikwekutsi ucale kuphendvula imibuto.
2. Ungalifundzi lonkhe liphepha lemibuto. Buka lokucuketfwe ekhasini lelilandzelako bese ubeka luphawu kulowo nalowo mbuto lobutwe ngetincwadzi lotifundze lonyaka. Emva kwaloko, fundza leyo mibuto lenetimpawu kuphela bese ukhetsa leyo lofuna kuphendvula yona.
3. Liphepha lemibuto licuketse TIGABA LETINTSATFU:
SIGABA A: Tinkondlo (30)
SIGABA B: Inoveli (25)
SIGABA C: Umdlao (25)
4. ISIHLANU IMIBUTO lefanele uyiphendvule seiyonkhe: ESIGABENI A imibuto mitsatfu (3), ESIGABENI B munye (1), ESIGABENI C munye (1) ngalendlela:

SIGABA A: TINKONDLO

Phendvula imibuto ibe mibili yeTINKONDLO LETIFUNDVWE EKLASINI.
Phendvula umbuto munye ETINKONDLWENI LETINGAKAFUNDVWA EKLASINI.

SIGABA B: INOVELI

Phendvula umbuto ube munye.

SIGABA C: UMDLALO

Phendvula umbuto ube munye.
5. KUKHETFWA KWETIMPHENDVULO TESIGABA B (INOVELI) NESIGABA C (UMDLALO)
 - Phendvula KUPHELA imibuto yenoveli loyifundzile kanye nemdlalo lowufundzile.
 - Phendvula UMBUTO MUNYE WENDZABAMBHALO KANYE NAMUNYE UMBUTO EMIBUTWENI LEMIFISHA. Uma ukhetse kuphendvula umbuto wendzabambhalo ESIGABENI B, uphokelekile kutsi uphendvule imibuto lemifisha ESIGABENI C. Uma uphendvule imibuto lemifisha ESIGABENI B, uphokelekile kutsi uphendvule umbuto wendzabambhalo ESIGABENI C. Sebentisa luhlu lwekutikhumbuta kute usitakale.
6. BUDZE BETIMPHENDVULO
 - Imibuto yendzabambhalo etinkondlweni kufanele iphendvulwe ngemagama la-190 – 240.
 - Indzabambhalo yenoveli nemdlalo kufanele iphendvulwe ngemagama la-340 – 390.
 - Budze betimphendvulo temibuto lemifisha bufanele buhambisane nelinani lemamaki labekiwe. Labahlolwako kufanele banganhlanhlatsi.

7. Fundzisisa kahle ticondziso letisekucaleni kwaleso naleso sigaba.
8. Tinombolo tetimphendvulo atihambisane naleto temibuto njengobe tinjalo ephepheni lemibuto.
9. Cala LESO NALESO sigaba ekhasini LELISHA.
10. Bhala ngesandla lesibonakalako nalesifundzekako.
11. Siphakamiso sekulawulwa kwesikhatsi:

SIGABA A: Lokungenani emaminitsi lange-40
SIGABA B: Lokungenani emaminitsi lange-55
SIGABA C: Lokungenani emaminitsi lange-55

LIKHASI LALOKUCUKETFWE

Lelikhasi litawusita bahlolwa kutsi bakwati kukhetsa imibuto labafuna kuyiphendvula ngaphandle kwekufundza lonkhe liphepha lemibuto.

SIGABA A: TINKONDLO		
Tinkondlo Letimisiwe: Phendvula nobe nguYIPHI imibuto LEMIBILI		
INOMBOLO YEMBUTO	UMBUTO	LIKHASI
1. Etinsukwini Letili-16	Umbuto loyindzabambhalo	6
NOBE		
2. Ngente Njani Manje	Imibuto lemifisha	7
NOBE		
3. Mvunulo Yemhlaba	Imibuto lemifisha	8
NOBE		
4. Umtapo	Imibuto lemifisha	9
NA		
Inkondlo lengakafundvwa eklasini: Phendvula nobe ngumuphi umbuto ube MUNYE.		
5. Ngicoleleni	Umbuto loyindzabambhalo	10
NOBE		
6. Ndvuku yemilingo	Imibuto lemifisha	11
SIGABA B: INOVELI		
Phendvula umbuto MUNYE.		
7. <i>Liphume Nebovu</i>	Umbuto loyindzabambhalo	12
NOBE		
8. <i>Liphume Nebovu</i>	Imibuto lemifisha	12 – 13
NOBE		
9. <i>Kubamba Letingelako</i>	Umbuto loyindzabambhalo	13
NOBE		
10. <i>Kubamba Letingelako</i>	Imibuto lemifisha	14 – 15
SIGABA C: UMDLALO		
Phendvula umbuto MUNYE.		
11. <i>Kwahlwa Emini</i>	Umbuto loyindzabambhalo	16
NOBE		
12. <i>Kwahlwa Emini</i>	Imibuto lemifisha	16 – 17
NOBE		
13. <i>Umvuzo</i>	Umbuto loyindzabambhalo	18
NOBE		
14. <i>Umvuzo</i>	Imibuto lemifisha	18 – 19

CAPHELA: Esigabeni B na-C, phendvula YINYE INDZABAMBHALO naMUNYE umbuto WEMIBUTO LEMIFISHA.

LUHLA LWEKUTIKHUMBUTA

Lelikhasi litawusita bahlolwa ekukhetseni imibuto labafuna kuyiphendvula ngaphandle kwekufundza lonkhe leliphapha lemibuto.

SIGABA	TINOMBOLO TEMIBUTO	LINANI LEMIBUTO LEPHENDVULWAKO	TICK
A: Tinkondlo (Tinkondlo letifundvwe eklasini)	1 – 4	2	
A: Tinkondlo (Inkondlo lengakafundvwa eklasini)	5 – 6	1	
B: Inoveli (Indzabambhalo nobe imibuto lemifisha)	7 – 10	1	
C: Umdlalo (Indzabambhalo nobe imibuto lemifisha)	11 – 14	1	
CAPHELA: Esigabeni B na-C, phendvula YINYE INDZABAMBHALO NAMUNYE umbuto WEMIBUTO LEMIFISHA.			

SIGABA A: TINKONDLO**TINKONDLO LETIFUNDVWE EKLASINI**

Khetsa tinkondlo tibe TIMBILI kuleti letilandzelako uphendvule ngato imibuto letawulandzela.

UMBUTO 1

Fundza lenkondlo lelandzelako bese uphendvula imibuto letawulandzela.

ETINSUKWINI LETI-16 – AT Fakude

- 1 Ningizimu afrika lenhle
- 2 Sidze lesikhatsi kukhalwa.
- 3 Kukhalwa ngesamboko ebantfwaneni,
- 4 Kukhalwa ngemphilo ebantfwaneni
- 5 Lokushisa buhanguhangu.
- 6 Lokushisa kushe ngisho nalobekusamila,
- 7 Kusale ticinchi letome nkhwa.
- 8 Letingayomila nini nanini.
- 9 Ngako-ke Ningizimu ye-Afrika lenhle,
- 10 Hamba nesikhatsi.
- 11 Phila nesikhatsi
- 12 Ngalenyatfuko lenje
- 13 Ningizimu Afrika lenhle.
- 14 Kutsanti bekulila make
- 15 Atfwel'umkhono enhloko
- 16 Akhihla saNandi sililo,
- 17 Akhala ngababe lophakamisa tandla,
- 18 Akhwele atehlele kumake
- 19 Ibe munyu imphilo yelikhaya.
- 20 Nyalo sekuyashunyayelwa,
- 21 Kushunyayelwa livangeli.
- 22 Livangeli lelicoloro nemusa.
- 23 Ngako-ke bonkh'abaphendvuke.

Bhala indzatjanambhalo lapho uhluta khona umlayeto lotfolakala kulenkondlo lengenhla, ubhekise kuloko lokwenteka emmangweni waseNingizimu Afrika.

Budze bemphendvulo yakho abube ngemagama langabi ngaphasi kwe-190 kodwa angabi ngetulu kwalangama-240.

[10]**NOBE**

UMBUTO 2

Fundza lenkondlo lelandzelako bese uphendvula imibuto letawulandzela.

NGENTE NJANI MANJE? – LX Nkambule

1 Ngentenjani manje
2 Nekukhunjulwa kwakho sekukhohlakele?
3 Akusanandzaba!
4 Ngiyawusala ngiwacocanisa
5 Lowawasho usawadl' emabele.

6 Ngentenjani manje
7 Indlelo seyishaye gobolophonjwana?
8 Nalowo mtfombo ngangisengakawuboni
9 Akusenandzaba!
10 Ngabe ngiyabhema manje
11 Ngiyatsimula ngiciphita tinyembetana.

12 Ngentenjani manje
13 Lenzawo ingephul' inhlitiyo,
14 Ngibabuka ngimbony' emehlo,
15 Ngibe lusizi ngidzabuke,
16 Ngingabe ngisakubonaphi?
17 Wawungadzangali kubeketela.

18 Bakubekile elugagadvwini,
19 Akuhushi moya, akukhali nyoni,
20 Ngibona nje ngesangcotfo
21 Naso sitigadvula phasi
22 Akusanatje lelinemlandvo:
23 Sigatjana, ngaso ngitidvudvute.

- 2.1 Bunkondlo buni lobusetjentisiwe ekucaleni kwetindzima 1, 2 na- 3? (1)
- 2.2 Sinongo sini lesicuketfwe ngumugca we-13 kulenkondlo lengenhla? (1)
- 2.3 Ucondzeni sonkondlo nakatsi:
Indlelo seyishaye gobolophonjwana? (Umugca 7) (1)
- 2.4 Tetsamelilwati talenkondlo tifundzani nganayi imigca yenkondlo lelandzelako?
"Ngiyawusala ngiwacocanisa
Lowawasho usawadl' emabele." (Imigca 4 – 5) (1)
- 2.5 Humusha lokushiwo yindzima yekugcina kulenkondlo. (2)

2.6 Abecondzeni sonkondlo ngalemigca, nakatsi:

Bakubekile elugagadvwini,

Akushishi moya, akukhali nyoni? (Imigca 18 – 19)

(2)

2.7 Kambe uma intfo yephula umuntfu inhliyiyo isuke yentani? Hlatiya.
"Lendzawo ingephul' inhliyiyo". (Umugca 13)

(2)

[10]

NOBE

UMBUTO 3

Fundza lenkondlo lelandzelako bese uphendvula imibuto letawulandzela.

MVUNULO YEMHLABA – JJ Thwala

- 1 Umuhle mvunulo yemhlaba,
- 2 Umuhle kuleto tindzawo
- 3 Lewuhlobise kuto ngentfobeko,
- 4 Buhle bakho buyababateka,
- 5 Buhle bakho buyamangalisa,
- 6 Mvunulo yetimangaliso.
- 7 Umuhle mvunulo yemhlaba,
- 8 Umuhle luhlongw' emakhondvosini,
- 9 Umuhle nsikan' etigangeni,
- 10 Umuhle lutindz' etintsabeni,
- 11 Umuhle mhleng' emacentselweni.
- 12 Umuhle mvunulo yemhlaba
- 13 Umuhle bewuyovunulani
- 14 Kube bewungekho mvunulo?
- 15 Uyihlobisile imvelo,
- 16 Ngebuhle bakho lobubabatekako,
- 17 Nangekuheha kwakho lokumangalisako.
- 18 Umuhle mvunulo yemhlaba,
- 19 Buhle bakho benanelwa
- 20 Tinyoni ngemaphimbophimbo
- 21 Kuncwincwita tincwincwi,
- 22 Kucocodza tincocodzi,
- 23 Kuswesweta tinsweti.

3.1 Bunkondlo buni lobuvelwa ngulemigca lelandzelako?

Umuhle kuleto tindzawo

Lewuhlobise kuto ngentfobeko, (Imigca 2 – 3)

(1)

3.2 Ngekubona kwakho ikhuluma ngani lenkondlo? Chaza ngeliphuzu linye.

(1)

- 3.3 Luhlobo luni lwesinongo lekalusebentisile sonkondlo emgceni we-21 kuya ema-23? (1)
- 3.4 Khokha umugca wenkondlo lonesifanangwaca uwubhale phasi bese uyasidwebela lesifanangwaca. (1)
- 3.5 Phawula ngephethini yalenkondlo. (2)
- 3.6 Khokha umugca loyimphindvwa kulenkondlo bese usho inhloso yasonkondlo yekuyisebentisa. (2)
- 3.7 Sinongo sini lesivetwa ngulemigca yenkondlo lelandzelako? Usho ngani? (2)
- Umuhle bewuyovunulani (2)
- Kube bewungekho mvunulo? (Imigca 13 – 14) [10]

NOBE**UMBUTO 4**

Fundza lenkondlo lelandzelako bese uphendvula imibuto letawulandzela.

UMTAPO – CD Masilela

- 1 Gogo ngungu yesive,
- 2 Uyincwadzi lehamba ngetinyawo
- 3 Ungumtapo wetincwadzi emphilweni yetfu,
- 4 Emaphiko akho asifukamela sonkhe.
- 5 Kuwe angisuye umntfwana wesihlahla,
- 6 Kuwe angisiwo umlanjwana, ngingumntfwana wagogo.
- 7 Ngiyingati yakho ngingumntfwanakho gogo.
- 8 Uyadvondvolotela kepha uludvondvolo lwetfu
- 9 Uyinsimu lesiyivuna sonkhe ngekukhululeka
- 10 Ulibhange letfu kantsi uyinkomati yetfu
- 11 Unjengesikolo kitsi, ungucedzasitunge.
- 12 Naloku ematsambo sekaphikisana nenhlitiyo,
- 13 Kepha inhltiyo yakho inguphethiloli
- 14 Lokuvuselelako, unyatsele ngemandla
- 15 Siyabonga gogo loligugu
- 16 Ungumtapo loligugu etitukulwaneni!

- 4.1 Yini lebangele sonkondlo asebentise luphawu lwesibabato (!) emgceni wekugcina walenkondlo? (1)
- 4.2 Ucabanga kutsi yini sonkondlo atsi gogo uyingungu yesive njengobe sibona emgceni 1? (1)
- 4.3 Ucondze kusitjelani sonkondlo nakatsi "Uyincwadzi lehamba ngetinyawo"? (1)
- 4.4 Bhala umugca wenkondlo locuketse lokusho kutsi gogo unelwati lolusilulu lesitawusita titukulwane. (1)

- 4.5 Bhala umoya lotfolakala kulenkondlo lengenhla bese ucaphuna munye umugca lowesekela imphendvulo yakho. (2)
- 4.6 Lesihloko lesitsi 'Umtapo' sihambelana kangakanani naloko lokushiwo ngulenkondlo? Sekela. (2)
- 4.7 Gogo uligugu lesive. Bhala kube kubili ummango lekufanele wentele bantfu labafana naye. (2)
- [10]**

NA**TINKONDLO LETINGAKAFUNDVWA EKLASINI.****UMBUTO 5**

Phendvula munye umbuto kulena lelandzelako.

NGICOLELENI – MA Magagula

- 1 Ningicukule ngilele emkhatsini webusuku,
- 2 Lapho bumnyama sebembes'umhlaba wonkhana,
- 3 Ngesiphuku lesicosha lilanga libaleke njengeligwala,
- 4 Ningisukele nganiphunga ngelihawu lakaButfongo,
- 5 Nemikhono yafoma yatselwa ngemahlambangwenya.
- 6 Ngahhehemuka kwabhonsa umhlaba wakhona,
- 7 Wahlokomela tindletjana tami takaNhlaka,
- 8 Nelulwinyana lwami lwashwabana ngaba simungulu.
- 9 Ngicoleleni micabango lemikhulu kakhulu,
- 10 Musani kutfukulula inkhatsa yetinsizi,
- 11 Letawubhobota siyalu setinyembeti,
- 12 Inhlitiyo idzabuke emkhatsini ivitsikile,
- 13 Ningangikhumbuti ligugu lelisikati lelangitala,
- 14 Ngadzilita lobo buntfombi bembali lenhle,
- 15 Ningangikhumbuti lelo gugu lami,
- 16 Lelabuna njengembali langishiy' esifubeni.
- 17 Ningisukele umnyama ukhasa phansi,
- 18 Kujakadvula tinyekevu netigolwane,
- 19 Naye nangishumphetel' esitwabhini sebutfongo,
- 20 Ingcondvo yami yacala kudideka,
- 21 Ingcondvo yayaluka yaphemba buyaluyalu,
- 22 Ngicoleleni micabango ngiyekeleni,
- 23 Ningavumbululi sigudzagudza lebesengisikhohliwe.

Bhala indzatjanambhalo ngengciki tsi yalenkondlo. Budze bemphendvulo yakho abube ngemagama langabi ngaphasi kweli-190 kodvwa kungabi ngetulu kwalangama-240.

[10]**NOBE**

UMBUTO 6

Fundza lenkondlo lelandzelako bese uphendvula imibuto letawulandzela.

NDVUKU YEMILINGO – JJ Thwala

- 1 Sichumachumane sebgcoki,
- 2 Makhaful'umlilo kuw'indvodza,
- 3 Ndvuku yemilingo simangalisondzini,
- 4 Lapho ukhonjwa khona kuyaliwa,
- 5 Imikhono ibekw'etinhloko
- 6 Sichumachumane setimangaliso,
- 7 Liklobakati lakho lembubhiso,
- 8 Umsindvo wakho wembubhiso,
- 9 Bakuphatsa kuvuk' imidlonga,
- 10 Ndvuku yetimangaliso, ndvuku yemilingo
- 11 Ndvuku lengagawulw' esihlahleni
- 12 Wehlukil' emisimbisini yakitsi
- 13 Legangadz' indvodz' igadvule,
- 14 Ifulatsel' umlibe, yembulule,
- 15 Ndvuku yetimangaliso, ndvuku yemilingo.
- 16 Ngawe kulalwa benyoni,
- 17 Ngawe kulalwa kungakadliwa,
- 18 Ngawe tisu tiyahlambuluka,
- 19 Ucakile ndvukundzini,
- 20 Ucakile ndvuku yemagwala.

- 6.1 Yini lendvuku lekukhulunywa ngayo kulenkondlo? (1)
- 6.2 Endzimeni yesibili kunemvumelwanosigcino. Bhala lemigca lenalemvumelwano bese uyayidwebela. (1)
- 6.3 Bhala luhlobo lwebunkondlo lobakhiwa ngulemigca lelandzelako:
 Ngawe kulalwa benyoni,
 Ngawe kulalwa kungakadliwa (Imigca 16 – 17) (1)
- 6.4 Kubangelwa yini kutsi sonkondlo atsi ngalendvuku yemilingo, "kulalwa benyoni"? Chaza. (1)
- 6.5 Usho ngani sonkondlo kutsi labasebentisa lendvuku yemilingo bangemagwala lapha emgcebi we-20? (2)
- 6.6 Ngabe sonkondlo ulikhetse ngemphumelelo yini leligama lelidvuwetjelwe kulomusho lolandzelako? Sekela imphendvulo yakho.
Liklobakati lakho lembubhiso. (2)
- 6.7 Utsini umbono wakho ngekusetjentiswa kwalendvuku yemilingo emmangweni? Chaza. (2)

[10]**SAMBA SIGABA A: 30**

SIGABA B: INOVELI

Kulesigaba kunemanoveli lamabili. Wena-ke khetsa ibe yinye loyifundze eklasini lonyaka uphendvule ngayo.

CAPHELA:

Khetsa emkhatsini WENDZABAMBHALO NEMIBUTO LEMIFISHA kuleyo naleyo noveli loyifundzile. Kumele uphendvule nobe ngumuphi umbuto ube MUNYE *ngaleyo noveli loyifundzile*. Uma ukheta kuphendvula umbuto wendzabambhalo kulesigaba, uphokelele kutsi ESIGABENI C uphendvule imibuto lemifisha.

UMBUTO 7: LIPHUME NEBOVU – BB Malangwane

Bhala indzabambhalo uhlute sakhiwo salenoveli ngaphasi kwaletihloko letilandzelako:

- 7.1 Singeniso
- 7.2 Ludweshu
- 7.3 Sicakacaka
- 7.4 Luvutfondzaba
- 7.5 Siphetho sendzaba

Indzabambhalo yakho ayibe nemagama langabi ngaphasi kwe-340 kodwa angabi ngetulu kwe-390.

[25]**NOBE****UMBUTO 8: IMIBUTO LEMIFISHA****LIPHUME NEBOVU – BB Malangwane**

Fundza lethekesthi bese uphendvula imibuto letawulandzela.

"Ase ungiphe umetjiso LaMagagula, sheshisa!"

"Ngitsi gijima bo, LaMagagula, kantsi lometjiso awuwuboni yini?" Washo vele asamhlangabeta ngobe abona kutsi uyamephutisela. Kwetinja lokwatsi kujikitisa imisidlana kuyamjabulela, wavele wakukhukhula ngesicatfulo, kwakhalela etulu kungati kutsi kwente njani. Washo walumeka indlu yekulala, wengca, wengca wayewulumeka emadladla nelilawu lendvodzana yakhe lenkhulu.

"Hawu Khumalo, kepha ungasamane ubayekele bacale bakhiphe timphahla tabo nebakitsi," kwasho LaMagagula etama kukhipha lokuncane lanemandla ekukukhipha.

[Likhasi 97]

- 8.1 Uma ufundza lethekesthi lengenhla utfola kutsi LaMagagula uvetwe njengemlingisi lonjani ngekwesimilo sakhe? Sekela imphendvulo yakho ngeliphuzu linye. (2)
- 8.2 Luvutfondzaba lutfolakala kusiphi sigameko kulenoveli? (2)
- 8.3 Uma ubukisisa sibekandzaba salenoveli yini leyenta kutsi kube lula kuLushawulo kutsi ashise tindlu? (2)

- 8.4 Lushawulo abeneticu tekuba ngumlimisi kodvwa utfolakala asebenta leminye nje imisebenti. Ucabanga kutsi bekubangelwa yini loko? (2)
- 8.5 Ngabe wena uyakholwa kutsi kuyenteka emmangweni kutsi umuntfu adliwe inhilitiyo? Hluta ubhekise emphilweni yaLushawulo naTintfombi. (2)
- 8.6 Nguliphi lelitfumba lelishiwo ngulesihloko salenovelu kutsi labhoboka laphuma nebovu? (2)
- 8.7 Wena ubona kutsi ngabe yini leyatfukutselisa Lushawulo kangaka aze angasafuni kuphindze ambone nakancane umkakhe lomncane? Bhala kube kubili. (2)
- 8.8 Kukhona labatsi Lushawulo abengumhlukumeti lomkhulu. Sekela nobe uphikise lombono ngekubhekisa enovelini. (2)
- 8.9 Bakhona labatsi Lushawulo Abelengela engotini yekuphatfwa sifo sengculaza. Ngabe tiliciniso yini letinsolo? Chaza. (2)
- 8.10 Umbhali walenovelu uphumelele kangakanani kwetfula umlingisi lomcoka? Hluta. (2)
- 8.11 Phawula indlela sibekandzaba salenovelu lesihambelana ngayo nemlingisi lomcoka. (2)
- 8.12 Umbhali walenovelu uyatecwayisa tetsamelilwati takhe ngekubaluleka kwelusendvo (umndeni) emmangweni. Fakazela loko ngekubhekisa encwadzini. (3)
- [25]**

NOBE

UMBUTO 9: *KUBAMBA LETINGELAKO* – DE Nkosi

Veta emasu lamane lasetjentiswe ngumbhali walenovelu ekuveteni balingisi bakhe, ubhale ngawo indzabambhalo. Indzabambhalo yakho ayibe nemagama langabi ngaphasi kwe-340 kodvwa angabi ngetulu kwalange-390.

[25]

NOBE

UMBUTO 10: IMIBUTO LEMIFISHA**KUBAMBA LETINGELAKO – DE Nkosi**

- 10.1 Fundza lethekesthi leyincenye yendzaba bese uphendvula imibuto letawulandzela.

"Ngikubone kukuhle futsi kufanele kutsi ngikuvakashele babe Tsabetse lapha ekhaya kakho," kusho Mphikeleli akhuluma angekhatsi emabaleneni akaTsabetse. Pho akacali kubeka lunyawo lwakhe kulelikhaya, wase wefika ngesikhatsi afuna indzawo yekuhlala.

"Siyabonana ndvodzana. Sibusiso lesikhulu kuvakashelwa nguwe. Emagalelo akho emisebentini yemmango avakele ndvodzana. Ungumholi sibili. Kuyakhombisa kutsi boMncina bawenta ngempela umsebenti wabo. Bawenta ngekutimisela nangendlela lefanele," kusho Tsabetse. Pho sewatsatsa umhlalaphansi.

Kadze ngifisa kulitfola litfuba lekukhuluma nawe tindzaba letitsintsa tsine ndvodzana. Ngikuletselwe nguNkulunkulu njengobe ulapha embikwami. Embikwekutsi sikhulume lokunyenti ndvodzana, ngicela ungilindze kancane ngisayolandza liputumende lami leliphetse tonkhe tincwadzi tami letibalulekile", kusho Tsabetse. Asukume ahambe aye ekamelweni lakhe, atsatse liputumende lakhe abuye nalo. Akhiphe sikhiya alivule bese ukhipha tincwadzi letimbili lesetiphaphatsekile atinike Mphikeleli atsi akatifundze. Incwadzi yekucala ibhalwe kutsi: "Bangive Velakhe Zwane, wangcwatjwa nguhulumende emgodzini C20007, emalibeni aseMzinoni ngamhlaka 5 Ingci. Incwadzi yesibili beyibhalwe kutsi: Lotive Lomawa Zwane, wangcwatjwa emgodzini E202020 emalibeni aseMbalenhle ngamhlaka 10 kuMabasa. Watifundza Mphikeleli tehla tinyembeti. "Ngitele lokunye, ngitfola lokunye."

[Likhasi 102]

- 10.1.1 Lethekesthi lengenhla iveta kucolela lokusezingeni lelisetulu impela. Uyavumelana yini naloku? Sekela imphendvulo yakho ubhekise kulokwenteka endzabeni yonkhe. (2)
- 10.1.2 Yini lena beyibangela kutsi kwehle tinyembeti kuMphikeleli? Chaza. (2)
- 10.1.3 Humusha lenkhulumo yaMphikeleli letsi: "Ngitele lokunye, ngitfola lokunye." (2)
- 10.1.4 Yini lebeyibangela kutsi Tsabetse atsi akube nguMphikeleli lofundza letincwadzi? Chaza. (2)
- 10.1.5 Umbhali usebentise ludvweshu lwangekhatsi kunika Tsabetse litfuba lekutisola ngaloko lakwenta kuMphikeleli. Phawula ngalombono ngekucaphuna emavini aTsabetse kulethekesthi lengenhla. (2)
- 10.1.6 Ngabe lethekesthi lengenhla ibumbene kangakanani nengcikitsi yalenzaba yonkhe? Chaza. (2)

10.1.7 Imphilo yaTsabetse naMphikeleli iveta ingwijikhwebu ekugcineni kwalenovelini. Vuma nobe uphikise lombono ngekwesekela imphendvulo yakho. (3)

10.2 Fundza futsi letheksthi leyincenye yendzaba bese uphendvula imibuto letawulandzela.

"Ngikubitele lapha ehhovisi lami Mphikeleli kutewukhuluma nawe," kusho Mncina. Uhleti nje ehhovisi lathishelanhloko Mphikeleli kunelilunga lesigungu lesiphetse esikolweni, Sikhulu Tsabetse. Watibonela naye Mphikeleli kutsi litje ligaya ngalomunye umhlatsi lamuhla.

"Lesifuna kukwati ngawe Mphikeleli kutsi bewufundzaphi kuleminyaka lephelile?" Kubuta Tsabetse.

"Ngifundze eSOMAFSCO."

"Yini loko? Yini?" Kubuta Tsabetse.

"Sikolo lengifundze kuso. Ligama laso ngalokuphelele yiSolomon Mahlangu Freedom College, likolishi lelisesifundzaveni iMorogoro eTanzania."

"Yekela kucamba emanga wena! Kuyatiwa kutsi bewusejele yonkhe leminyaka kanye neyihlo. Make wakho ushona siyamngcwaba njena nisejele nine. Sikolo angeke sikwati kuchubeka nekufundzisa siboshwa lesifana nawe, ngako-ke sicela kutsi udedele bantfwana labanemarekhodi lamahle bafundze. Siboshwa nemfundzi bantfu lababili labehlukene labo. Sishiye ngekuthula lapha ngobe utawufundzisa bantfwana imikhuba lemibi."

"Akusilo liciniso lelo babe. Nguliphi licala lami lelenta kutsi ngilahlekelwe litfuba lekufundza?"

"Awunacala unemacala. Iminyaka yakho ingetulu eminyakeni lelindzelekile kulelibanga. Iphothfoliyo yakho lewubuya nayo le khashane siyehluleka kuyifundza, ngako-ke asiyemukeli. Sitawube sifaka bantfwabetfu engotini uma singavuma ufundze nabo njengemuntfu lochamuka ekhulukutfu," kusho Tsabetse.

[Likhasi 15 – 16]

10.2.1 Ngabe lenkhulumo yaTsabetse letsi 'Kuyatiwa kutsi bewusejele yonkhe leminyaka' ingumbono nobe ingemaciniso yini? Usho ngani? (2)

10.2.2 Nguliphi ligalelo lelifakwa nguletheksthi lengenhla enovelini yonkhe? Chaza. (2)

10.2.3 Kungamfanela Mphikeleli loku lokushiwo nguTsabetse kuletheksthi lengenhla. Beka wakho umbono ngalesitatimende kuletheksthi lengenhla bese uyawesekela. (2)

10.2.4 Chaza kutsi umbhali usisebentise kahle yini lesisho lesitsi'litje seligaya ngalomunye umhlatsi,' kuletheksthi. (2)

10.2.5 Letheksthi igcamisa kuhlukunyetwa kwemalungelo ebantfwana. Uyavumelana yini nalombono? Sekela lokushoko. (2)

[25]

SAMBA SIGABA B:

25

SIGABA C: UMDLALO

Kulesigaba kunemidlalo lemibili. Wena-ke khetsa ube munye lowufundze eklasini lonyaka uphendvule ngawo.

CAPHELA:

Khetsa emkhatsini WENDZABAMBHALO NEMIBUTO LEMIFISHA kulowo nalowo mdlalo lowufundzile. Kumele uphendvule nobe ngumuphi umbuto ube MUNYE *ngalowo mdlalo*. Uma ukhetse kuphendvula umbuto wendzabambhalo enovelini, uphokelelekile kutsi kulesigaba uphendvule imibuto lemifisha. Uma ukhetse kuphendvula imibuto lemifisha enovelini, uphokelelekile kutsi kulesigaba uphendvule umbuto wendzabambhalo.

UMBUTO 11: KWAHLWA EMINI – JJ Thwala

Bhala indzabambhalo lapho uphawula khona ngemphumelelo yembhali ekwetfuleni sibekandzaba salomdlalo. Lenzabambhalo yibhekise kulamaphuzu lalandzelako:

- Simo senhlalo/indlela yekuphila
- Simo sendzawo
- Simo sesikhatsi.

Indzabambhalo yakho ayibe nemagama langabi ngaphasi kwe-340 kodvwa angabi ngetulu kwalange-390.

[25]**NOBE****UMBUTO 12: KWAHLWA EMINI – JJ Thwala**

Fundza lethekesthi lelandzelako bese uphendvula imibuto letawulandzela.

(Elawini laNkhanise kunaNdzabeni)

NDZABENI: Uphi Sicongo?

NKHANISE: Uphumile wacondza kulela liwa lelilapha entasi. (*Asho akhomba*)

NDZABENI: Intfo lebangela kutsi ngimbute, kutsi lesijula asisekho endzaweni lebengisibeke kuyo. Sisuswe ngubani lapho bengisibeke khona?

NKHANISE: NguSicongo labephutsata sijula sakhe lapho. Angingabati kutsi nguye lotsintse lapho kungamele atsintse khona.

NDZABENI: Ngicela kutsi ungasitsintsi nyalo. Siyekele khona lapho emsamo. Ngiya ekhaya nyalo ngiyawulandza konkhe lekufanele mayelana naso kuze ngivuselele emandla aso. Kumele ngitfole nekutsi siphethwe bantfu labangaki ngembikwekusiphatsa.
(*Waphuma Ndzabeni, wacondza kakhe. Wasala yedvwana Nkhanise.*)

NKHANISE: Lamuhla lwemancamu. Sicongo uphumile uyekwenta umsebenti lobalulekile. Liyawushona Makhosi akulemadlotii. Sicongo uphume naNdleleni. Ndleleni uyewubita Makhosi, ambitele kulela liwa (*asho akhomba*) kube sengatsi ubitwa nguLungile. Utawuya agijima. Utawehlela futsi. Ngeke asakhuphuka. Nangasibamba kanjena Sicongo lesijula (*washo atsatsa lesi lesisemsamo alingisa*). Wo, yenteka indzaba! Ngivelelwa yini bo? Maye! Maye, ngafa mine. Maye ngafa emini kalobha, liba ... le ... le ...
(*Waphuma umphefumulo walala phasi tfwi, wenaba.*)

[Likhasi134 – 136]

- 12.1 Liwa lebeKacondze kulo Sicongo linabuphi budlelwano nesiphetfo salomdlalo? Chaza. (2)
- 12.2 Ngumaphi lamandla lafanele avuselelwe nguNdzabeni kulesijula? (2)
- 12.3 Yini lebangela Ndzabeni etfuke kangaka nakabona sijula singekho endzaweni yaso? Chaza. (2)
- 12.4 Labanye bantfu bayawaboniswa emalanga abo ekufa. Fakazela lombono ngekucaphuna emavi aNkhanise kuletheksthi lengenhla. (2)
- 12.5 Tetsamelilwati tifundzani kulomdlalo? (2)
- 12.6 Letheksthi lengenhla yakha yiphi incenye yesakhiwo salomdlalo? Chaza. (2)
- 12.7 Catsanisa umbango waNkhanise naMakhosi uwubhekise esimeni setepolitiki esikhatsini salomuhla eveni laseNingizimu Afrika. (2)
- 12.8 Siphetho salomdlalo sibe yingwijikwebu. Uyavumelana nobe uyaphikisana yini nalombono? Sekela imphendvulo yakho. (2)
- 12.9 Kulesinye sikhatsi kufa kuyambita umuntfu atihlalele. Phawula ngalombono ubhekise kuSicongo. (2)
- 12.10 Ngabe Mkhalelwa ulilandzele kangakanani ligama lakhe kulomdlalo? Phawula. (2)
- 12.11 "Imbilapho ivuna silondza". Hlatiya lesaga usibhekise kuLaJele, unina waNkhanise. (2)
- 12.12 Ngabe umbhali walomdlalo usetfule ngayiphi indlela lesaga lesitsi, 'tibanjwa ngaletikudlako', kuletheksthi lengenhla? Chaza. (3)

[25]**NOBE**

UMBUTO 13: UMOVUZO – NS Nzima

Hlatiya ngalokujulile sifundvo lesitfolakala kulomdlalo nangemasu lasetjentiswe ngumbhali ekusetfuleni.

Indzabambhalo ayibe nemagama langabi ngaphasi kwe-340 kodvwa angabi ngetulu kwalange-390.

[25]**NOBE****UMBUTO 14: UMOVUZO – NS Nzima**

Fundza lethekesthi lelandzelako bese uphendvula imibuto letawulandzela.

LaNgwenya: Umhlolo! Umhlolo! Umhlolo!!

LaMbuli: Kwentenjani makhelwane?

LaNgwenya: Umhlolo sibili lona! Lafa live silibukile bo!

LaMbuli: Kwentenjani Makhelwane? Wabelesela ngelemhlolo nje kwentenjani?

LaNgwenya: Tinyanga setishiya tindumba tiye etikolweni tiyewucoca nebantfwabetfu ngetebunyanga? Bodokotela bashiya emasejari abo bayewucoca ngetebudokotela nebantfwabetfu. Yini lena leyentekako?

LaMbuli: Ngabe kubi ngani loko makhelwane? Bantfwana sibafundzisela kutsi babe yincenye yemmango. Silindzele bodokotela, tinyanga, bameli, nalabanye kubo. Kuhle kutsi bangene emkhakheni lebase bacocisana namunye, babili nobe labanyenti kuwo.

[Likhasi 98]

- 14.1 Esikhatsini lesinyenti batali labangatibandzakanyi nalokwenteka esikolweni kuba lukhuni kubambisana nabothishela. Thishelanhloko waseMkhuphukantsaba abeyincoba kanjani lenkinga? Chaza. (2)
- 14.2 Inkhulumo yaMnumzane Shabalala lephatselene neligalelo lathishela emmangweni ingacondzisa tiphi tigwegwe emimangweni lesiphila kuyo? Bhala timbili. (2)
- 14.3 Umbhali walomdlalo uvula tetsamelilwati takhe emehlo kutsi ticaphelisise uma kucanjwa tintfo nobe tikhungo letitsite emagama. Humusha lombono ubhekise egameni lesikolo saboBatjele. (2)
- 14.4 Shano yinye intfo lengumbulalave emmangweni wangakini lobona kutsi ifake Mlandzeli enkingeni? Shano nendlela yinye lekuliwa nayo ngayo. (2)
- 14.5 Ngabe Satile wawafeza yini emaphupho akhe labenawo nakacala libanga lelishumi nakubili? Sekela imphendvulo yakho. (2)

- 14.6 Kulomdlalo LaMbuli uyala Batjele ngekutiphatsa nangabe afuna kuba yintfombi lehlonipha singani sayo neyisetala. Phawula ngemfundzisolite. (Inkhumo letsatfwa njengemaciniso kantsi itsintsa imiva yalabanye) ubhekise kulomyalo waLaMbuli. (2)
- 14.7 Ngekwemtsetfosisekelo ngabe ngumbono yini nobe kungemaciniso kutsi kubalulekile kutsi bafundzi bacocisane netinyanga kanye nabodokotela etikolweni tabo? Chaza. (2)
- 14.8 Indlela lekufundvwa ngayo eMkhuphukantsaba ingayitfutukisa kanjani imfundvo yelive lakitsi laseNingizimu Afrika? Chaza. (2)
- 14.9 Siphetfo saSatile sinaligalelo lini etimphilweni telusha lwalomuhla? Chaza. (2)
- 14.10 Ngabe lomdlalo utilandzele kangakanani tigaba letifanele tibe khona esakhiweni semdlalo? Hlola. (2)
- 14.11 Phawula ngekubumbana kwemnyakato nenkhulumiswano kulomdlalo. (2)
- 14.12 Tjani lobulele buvuswa ngumlilo. Humusha lesaga ubhekise kuMlandzeli. (3)
- [25]

SAMBA SIGABA C: 25
SAMBA SAKO KONKHE: 80